





客來何處黃山白嶽之區我歌且謠紅豆烏絲之調  
彌正平惟耽撾鼓曠達不羈王子晉雅善吹笙淒清  
欲絕千篇繡虎揮殘河北花箋五夜雕龍擘盡膠東  
粉紙則有登山臨水抹月批風六朝之嵐影千層書  
愁不少萬古之江流一幅製恨偏多詞客無還空悲  
故巷醉翁大去只見新亭過野渡而哭滄溟上荒臺  
而叫閶闔玉玲瓏小閣何非惜鳥啼花金麗毅名園  
盡是傷羅怨綺此酒旗歌扇牛給事慣倚新聲劔匣  
詩瓢柳郎中亦調小令也而況頻年歎老逐景嗟貧  
芰荷爲衣久乏綈袍於故友枵蕭果腹敢期進食於



王孫悲客館之秋風十年寥落聽僧牀之夜雨千里  
飄零李太白思鄉心莫傷於見月王仲宣作賦頭半  
白於登樓又隨處詠諧俗子嗤其落魄而逢人謔浪  
我輩歎為善鳴者矣嗟乎僕本楚狂身留吳市楚天  
似墨魂銷畫裏家山湘草如羅腸斷夢中歸路不得  
掃愁之竹賴此銀箏倘無蠲忿之犀端惟玉管把君  
詞而期過日綴余序以訂忘年快絕一時共成千古  
然而朱君竹垞月旦業已進於雅音杜老茶村揄揚  
急欲引為同調觀其止矣復何言乎獨步於花間蘭  
畹之中桓子野大為撫掌競爽於蝶撲鶯譎之下周

公瑾極其賞心則惟誇井華汲處咸披李嶠之章且  
遙妬池館開時爭唱元稹之曲云爾  
癸巳仲春既望長沙陳鵬年題於潤州之玉映山房

題辭

不知何故羣然尚四六而古文之道微然古人亦作四六而古文自若有在四六之先者也時人無之故并其所為四六可嘔也又羣然尚小詞而風詩之道微然古人亦作小詞而風詩自若有在小詞之先者也時人無之故并其所為小詞可嘔也吳子秋屏示余以所作小詞如干首短者有窈窕之思長者有歷落之致莫不按之不浮察之有故此非有在小詞之先者歟秋屏欲不以余為同調豈可得乎丁卯花生日村翁杜濬題



花間尊前而後言詞者多主會端伯所錄樂府雅詞  
今江淮以北稱倚聲者輒曰雅詞甚矣詞之當合乎  
雅矣自草堂選本行不善學者流而俗不可醫讀秋  
屏詞盡洗鉛華獨存本色居然高竹屋范石湖遺音  
此有井水飲處所必歌也小長蘆朱彝尊識

詞家狃於本色當行之說多以柔情曼語標新競異  
然宜於小令而不宜於長調宜於閨情春思而不宜  
於登臨感遇詠物懷人諸作故自香奩之外求其合  
作者難矣茲集不屑作柔曼之音純以長調取勝豔  
而不靡麗而不纖清而不膚爽而不率思沉力厚法

備神全極詞家之能事近時以長調擅場者香巖迦  
陵而外指不多屈先生殆駕而上之矣癸酉花朝山  
陰弟何嘉延

向客京邸與其年蕺山次山諸子卽景填詞殆無虛  
日垂老南歸時又與秋屏按商切羽秋屏詞情恂雅  
旣不流於柔靡復不蹈於豪放淡妝穠抹俱所不事  
直得白石玉田神髓秋屏居各一方不獲與其年賞  
奇晰義後猶得與蕺山把臂京師朝夕論定稱其精  
微奏節俱臻三昧非漫作者意中之言言外之意又  
當求之聲調之表非秋屏不足以當此噫難言之矣



八十一叟同里姚潛拜識

詞者樂府之遺音也倚聲按拍致有纏絲長言詠歎庶或近之與余友吳秋屏長於詩原本風騷得古人規法間以新意填詞氣韻沖澹迥絕俗調秀水竹垞朱先生雅爲推許以高竹屋范石湖仿之先生當今之學海菘林也品題必當余又何能益一語惟舉先生所稱以述於世之嗜學者將見秋屏之詞不特一時紙貴矣吳門同學弟申瑋書

長短句濫觴於李唐至趙宋而極盛近時諸家又各標新領異然江河日下狼籍沓拖貽累詞壇不小秋屏獨以閒雅出之無不各盡其妙狂瀾一柱其在斯乎庚辰十月金壇弟周而衍

永遇樂題秋屏詞

昔與髯翁

其年

討論聲調中夜忘寐自失鍾期誰爲

公瑾不食春蠶字寒蟬枯木縱留細響拚作醬瓿邊  
紙怪今番秋原見獵爲君輾然心喜 一編示我夢  
窗粉本濯濯柳絲煙際玉局才情屯田風韻並入霜  
毫裏沉吟還問軟紅塵影怎着畹蘭江芷素娥妬金  
波滿瀉浸他卷尾

長洲弟黃庭戢山



菩薩蠻慢

魚箋小字向紅筵緩唱送他才菽博得箇調笑多狂  
 俯紈扇羅巾粉濃香膩高韻天成冷淡裏自生風味  
 對清泉白石拍出宮商另般娛戲 有時帽簷側倚  
 正秋空極目煙靄無際恁筆端傳盡脆玉哀音又雲  
 外招來怨鶴孤唳珠串歌喉都脫却女兒家氣愛蒼  
 髯笙簧別奏也成幽吹

吳趨申 瑋弱生

秋屏填詞

長洲黃 庭藪山

閱定

會稽商元極綺墅

瑞鶴仙 六朝松石

尉遲杯 詠螺杯

鳳凰臺上憶吹簫 登鳳凰臺

浣溪沙 龍興寺紅橋

石湖仙 過高郵追懷秦淮海

漢宮春 綠瓦代枕



水龍吟 徐州放鶴亭

三姝媚 天竺果

喝火令 客有以閩中茶爐見貽者填此酬之

念奴嬌 詠圖章

前調 應以人邀食新韭

前調 禿筆

前調 收天泉

酷相思 人面桃

蝶戀花 古鏡菴訪夢菴不遇

厭金杯 詠匏杯同胡致果先生

滿庭芳 芷園席上曹東臯索贈

青玉案 曉發全椒道上

踏莎行 雞鳴山

賀新郎 姚後陶先生萬松閣

前調 詠弓

前調 送曹渭符歸北

前調 晤余澹心先生用迦陵韻

沁園春 醉翁亭

前調 冷齋月下載酒

前調 除草



浪淘沙 野渡菴

洞仙歌 瑯邪山

醉翁操 由醉翁亭倒入黃草窪

水龍吟 柏子潭

南鄉子 新浴和梅村先生

千秋歲引 贈芥菴和尚

滿江紅 荔堂送春同後陶先生

前調 檢曆

踏莎行 曉過鄭州道上

洞仙歌 訪恒齋僧寓不值

惜黃花 集顧友星水亭

臺城路 寒樹

綺羅香 賦得僧敲月下門

望湘人 示一悟上人

雨中花 荒庭紅梅僅作數花風雨經旬殊堪憫惜

錦纏道 補梅

賀新郎 家汝梅以羊裘相贈垂五年矣今毛落衣敝追憶前情感而賦此

水龍吟 周東會自黔中歸金沙以箴子書和孟浩然詩寄惠因和潘孟升韻答之

風入松 炙硯



秋屏詞鈔

瑞鶴仙

六朝松石

黃海 吳貫勉 尊五

杏花村裏宅有老叟支離蒼然而立倚玲瓏雲石作  
 半空風雨虬龍呼吸與天同碧又化作鸞翔鳳翮掃  
 紫煙一派奇光宛若兩翁拱揖 尋覓當年司馬幾  
 筆留題依稀堪識蹲眠如虎冰雪鍊苔莓蝕歲寒心  
 結對耐交老友閱盡興亡頃刻待秋清月白重來吹  
 殘鐵笛 石上鐫有溫公題詠



尉遲杯

詠螺杯

驚人目見五色輝映霞觴覆初疑雞勺山尊細認龍  
宮水族鬱金酒滿浸透體凝脂綻紅玉繞秋孃九轉  
迴腸點點轉轆心曲 月中蚌老珠分染翡翠鮮穠  
眉影堆綠欹倚晶盤犀筋畔光豔閃兩行華燭最憐  
惜嬌擎纖手十分勸溫柔情意足怪隔花羯鼓催來  
幾聲又道乾速

鳳凰臺上憶吹簫

晚同龐鍾子先生登鳳凰臺

寺入雲深雲橫臺古聽鐘來覓龐公怪十年草草別  
恨重重憶起花晨月夜今日事莫又匆匆登高望三  
山二水晉代吳宮 矇矓夕陽衰草染一色紺雲挂  
在深松柰鳳兮已矣焉問梧桐不是仙才李白誰敢  
弔舊日遺踪狂歌起幾聲清越老子猶龍

浣溪沙

淮上龍興寺紅橋

和壁間韻

寺跨長橋截去流煙銷水闊最宜秋翻憐此地勝揚  
州 清露朝勻紅葉老夕陽晚下白蘋愁人倚闌干  
樓外樓



石湖仙

過高郵追懷秦學士

舟過淮浦問當日才人舊居何處近岸落征篷向荒  
城臨風弔古孤村流水尚彷彿日沉秋暮無數只傷  
湖冉冉煙樹 高歌仰天酌酒柰篙師揚帆竟去搔  
首茫然細詠風流佳句鳧鴨梳翎藕花綴露添人情  
緒須記取滄波月湧歸路

漢宮春

綠瓦代枕

午睡銷閒借故宮鴛瓦一覺遊仙曾伴朱甍金獸影

過花甌而今冰簟送幽人夢入高寒依稀似漢宮將  
曉曹朧翠擁香鬟 多少蓬壺閬苑到雨淋煙滅大  
抵邯鄲歎與春深銅雀流落人間曲肱而倚逐行雲  
綠徧巫山因像想鳳城柳色碧沉新月同彎

水龍吟

徐州放鶴亭

過河未脫征衫逢人便詢山間路夕陽牽引寺門深  
窅峭峰無數鐵笛纔呼如何摧落亂楓如雨且層層  
上了蒼苔怪石浩歌一亭今古 遙想扁鵲雙影望  
西山月明翔舞祇今不見更千年後有誰招汝汝曷



歸來趁予孤往結爲伴侶好盤桓萬樹虬松長嘯碧  
雲秋暮

三姝媚

天竺果

雪窺簷際白見柯條叢生火珠堆赤翠葉扶疎似鳳  
毛交映珊瑚初擊錯落星懸勢欲墜嬌擎無力慣惹  
幽禽紅豆疑猜下而爭食 最與黃梅生色畧點綴  
寒香離離鮮滴蜜珞珠瓔作錦幢風動法華妝飾寶  
珥瑤簪粒粒怪針穿無隙看徧南城僧院緊抓難得  
喝火令

客有以閩中茶爐見貽者填此酬之

春水團紅粉晴山曬白沙陶成新樣淨無瑕傍鑿洞  
門深窈受風斜 響沸松梢雨光蒸薄暮霞兩三知  
已鬪新茶再去林中掃葉煮胡麻未許邯鄲道士帶  
月煉丹砂

念奴嬌

詠圖章

君能作我論知交結契銘於金石老凍新坑人盡道  
彷彿秋痕一色漢篆秦文雙名小字巧配人爭識書  
頭詩尾幾番點染妝飾 任爾玉骨冰肌脂凝春面



和房詩金 四  
猶借珊瑚赤片紙書傳千里外細認故人踪跡袖裏  
摩挲匣中顛倒清潤真堪惜螭盤龜紐倩他妙手摹  
勒

前調

應以人邀食新韭

渾忘茶苦有同心念我邀嘗新韭剪得嫩芽纔徑寸  
莫比淡黃初柳色沁晶盤香流玉筋最趁鶯兒酒鮮  
新軟美吳菘堪與爲友因思花外蔬畦露滋春曉  
小摘纖纖手煙際抱來猶怯冷漬了翠羅雙袖不厭  
貪饜且須細嚼療我垂涎口漫窺藿甕吾家一尺纔

有

前調

秃筆

嗚呼老矣問家世臣本中山舊族多少少年遊戲事  
穎發千人推服曾幾何時棄同敝帚怪我顛毛秃江  
郎一夢從今花變爲竹不思縹案牙籤頭纏雲錦  
拜命榮天祿但念風流嬌冶甚親染湘裙六六妙跡  
猶存真香如在折盡生平福宜乎衰鈍挂冠歸臥空  
谷

前調



收天泉

三時無雨正愁飢未了更兼愁渴忽見莽雲從地起  
一刻矮簷噴雪珠撒瓊漿盤承玉露輕漱寒香冽惠  
山揚子泠泠無此澄澈因憐米甕常虛山尊屢空  
洗滌涓涓潔滿貯白雲充石鼎不礙隱之清節小淪  
梅花徐煎蟹眼壺裏何曾竭客來共飲藤蘿石上看  
月

酷相思

人面桃

洞口霞烘春幾樹似面面將人覷綴釵頭助嬌卿莫

妒深紅也鬪眉嫵淺紅也鬪眉嫵去年今日人何  
處笑倩風光護看一樣凝妝羞不語樓上也愁春去  
枝上也愁春去

蝶戀花

古鏡菴訪夢菴不遇次南溪詞韻

嵐翠生涼朝似暮曲折深叢幾被停雲誤密葉蒙香  
青綴露杖藜何處迎秋去悵望偏慳今日晤磬杳  
鐘殘一鳥啼閒樹竹裏清泉門外路徘徊豈肯成虛  
度  
立秋前一日

厭金杯



詠匏杯同胡致果先生

劈破葫蘆削成杯，  
筭就輕圓製分三雅勝。  
田家老瓦碧液纔傾，  
堪重把滿注，須妨倒瀉。  
拈來香灑摩去，  
光凝比霜後黃柑，  
還赭竹根醉臥。  
分付小童青筇枝，  
挂移酌瓜棚蔓架。

滿庭芳

芷園席上曹東臯索贈

薄被聯牀深杯勸酒，  
不堪同是窮途。近來天意潦倒，  
困吾徒莫憶揚州舊話。  
紅橋畔十里芙蓉，  
新涼夜歌邀月上，  
水淨冶香鋪。歛歛歸未久，  
溪山清絕，何處

吾廬只三十，  
過頭霜染髭鬚，  
還剩平原蔬圃。  
煙雨後常帶經鋤，  
休嘲笑英雄氣短，  
今做灌園夫。

青玉案

曉發全椒道上

霜威觸面天將曉，  
驢背一鞭風裊。  
殘月枝頭光更皎。  
板橋人過籬門，  
犬吠催動寒栖鳥。  
漸看天外紅雲渺。  
煙裏晴光透，  
林表幾日山陰纔雪了。  
危牆低亞道，  
俯斜臥白逗梅花小。

踏莎行

雞鳴山



舊寺鐘寒平山雲起玉衡不見銅龍死荒臺芳草自  
留青消磨夜月元湖水 小閣新支空亭孤倚花香  
鳥語山光裏城南城北望分明一番春色愁人爾

賀新郎

姚後陶先生萬松閣

與叟銷長夏說京山巋然一閣景堪圖畫左跨清江  
天萬里雪濺玉龍奔射指點見快船如馬右瞰平湖  
沙激闊嵌丹巖碧樹開蓮社先人墓在其下 屏張  
列岫蒼雲挂帶天矯虬松鱗鬣乘風欲化晴日掀濤  
天似雨翠抹陰陰飄灑爲爾告後來遊者多少衣冠

塵土盡慰忠魂可賀茲丘也休絮絮傷心話

前調

詠弓

紅近軒分賦

朔角平分列伴將軍腰間馬上血腥寒鐵滿引西風  
驚裂石瞥底翎花飛雪問若箇能穿楊葉素壁空懸  
無所用映深杯弄影疑還怯又畧似初生月 四方  
之志何曾歇撫雕鞍髀生肉矣此爲虛設飛鳥秋原  
猶未盡且逐鷹鷂田獵思鴻鵠應弦而滅更擬佳人  
蓮步穩愛一灣襯出凌波襪兒女態英雄物

前調



送曹渭符歸北

琴劍來南國就長干  
雲林深處暫羈行迹  
憑覽春江花月夜  
醉愛鄰僧吹笛  
又銀鹿琵琶橫膝  
只此陶情絲竹意  
便風流慷慨誰能及  
方聚首盟金石  
吟鞭何事謀歸急  
徧天涯  
天桃弱柳綠愁紅  
惜相送未曾攜  
別酒自哂窮交無益  
君或者知予之力  
轉眼煙霞千萬頃  
望車塵漸遠關河隔  
且執手須臾立

前調

晤余澹心先生用迦陵韻

老鶴橫空攫有仙  
翁白雲高妙吳山栖  
託故國鶯花

隨杖履恰到鳳凰臺  
脚歎大雅於今誰作老  
瘦豪吟神氣王似漢家  
詠笑臣名朔奚囊句儘  
人索幾年不到青蓮閣  
看兒孫臨風四代獻觴  
酬醉眼底故人誰得似  
太息都成輕薄更莫惜  
春光零落剩有江南風  
物好喜秦淮簫鼓還如  
昨且小住買舟樂

沁園春

醉翁亭

嘉木叢中路轉山腰  
一亭洞開愛泉飛古雪  
香堪釀酒雲流盤石  
曲可傳杯釣引溪鮮  
肴陳野蔌隨意行春  
翁醉哉危樓上看崖  
傾翠壓雨送青來  
梅花突



兀橫堦好須認先生當日栽想數枝初綻煙籠瘦竹  
餘寒半護月印蒼苔鐘度聲聲雅翻點點多少高風  
寄古懷徘徊久笑予今獨醒不飲空回

前調

冷齋月下載酒

月上藤蘿清絕如秋光輝皓然況微風澹蕩羲皇以  
上故人至止晉魏之間笑我新詞非今急務辛苦何  
曾直一錢真無謂作花間綺語紙上空言 當頭莫  
負嬋娟儘讓爾攜尊話竹關看披襟跣足主偏倨傲  
持杯勸酒客反周旋如此疎狂真成簡畧天放吾徒

幾箇閑今宵樂勝朱樓簫鼓畫舫絲絃

前調

除草

寂寞村居三徑荒蕪迷離草長看疎煙未散低沉曲  
檻微風時動綠到匡牀密護當門叢生塞路勾引鄰  
雞過短牆良朋至怪一庭如此焉問行藏 往來屐  
齒應妨且荷鍤腰鎌趁晚涼笑淒淒如薤人題書帶  
茸茸着露夢繞池塘籬下須刪石根漫劬留待新秋  
夜聽螢朝來雨漸柔茵鋪滿依舊蒼蒼

浪淘沙



野渡菴

卽韋蘇州詠野渡無人舟自橫處

古澗抱城隈路徧苔埋新潮急雨走輕雷黃鳥似知  
人問渡喚過舟來竹下一門開傍晚鐘纔閒雲幾  
片寫孤懷幽草誰憐春作客綠滿天涯

洞仙歌

瑯邪山

山行數里到蔚然深處樹樹龍鱗雪霜護繞闌干時  
見白鹿穿雲頻回顧似欲引人覓路天門高百丈  
修竹搖青忽響千山半空雨石罅瀉寒流玉帶橋橫  
更松子香清滴露特掃壁題詩寄相思恨不見幽人

洞中無主

醉翁操

依毛稚黃圖本

由醉翁亭倒入黃草窪

醉翁山中芳亭轉峯迴龍從循岩悞入煙冥濛暗迷  
春碧重重何處鐘幽響發深松縹緲聲捲孤嶼風  
乍疑洞合忽訝天空水穿曲磻如引仙源路通攀鶴  
巢之遊龍入象王之幽宮香林東復東雲扉開芳叢  
鳥語叩疎櫳倚樹無言花笑紅

水龍吟

柏子潭

潭心一石蓮高五尺許俗謂以石投中者兆可生子



問人何處龍潭陡岡背入蘼蕪裏鳩呼雨至風鞭山  
走俄看雲起古柏皆枯荒碑沒字長垣傾圯歎平郊  
十里當年牧馬而今盡牛羊矣 傳說五龍降此沛  
甘霖尚存遺趾陽陂忽轉小橋橫鏤一泓澄水鴛鴦  
纔拋石蓮剛打笑將遊戲聽滁人說是靈奇堪信居  
然生子

南鄉子

新浴和梅村先生

皓臂褪雙環碧濯香肌暈透盤蘭氣煖薰春意輒羞  
看小幅冰綃蘸露乾 紅潤玉珊珊衫子新裁可試

單鬢縮惺鬆猶未理凭欄昨夜梨花雨後寒

千秋歲引

贈芥菴和尚

湘水才人鍾峯老衲豎起天童杖高揭家園已破黃  
金死鬚眉猶帶蒼松色景陽鐘銅井水眼前睫 庭  
柏噴香開五葉山月照人空一切身世文章等消歇  
荒原野燒狐兔走故宮冷咽松楸血休回思如意碎  
唾壺缺

滿江紅

荔堂送春同後陶先生



雨雨風風添多少綠窗閒雅拍手笑披裘老子吳門  
歸也相送十年窮不去偏憐三月春難借趁殘山猶  
剩兩三人開懷話淪苦茗蒼藤下過濁酒疎籬罅  
見晚雲送影近簷低亞隔葉聲傳鶯瘦小倚堦紅褪  
花飛卸只緜緜蘿薜似春心都牽挂

前調

檢曆

落拓孤踪畏人說一年將盡待重看舊曆從頭無剩  
連日寒添椒酒價半天雪問梅花信竟茫然年去復  
年來韶光迅人事改寧須論三百六真難定算幾

番風雨幾番愁悶天上正多閒歲月煙霞好景何妨  
閨尚幾朝快讀古人書無多分

踏莎行

曉過鄭州道上

霧隱千層星懸幾點荒雞聲裏柴門掩東臯漸近漸  
微明須臾日透胭脂淺落葉如鴉長堤似線孤城  
一半雲中見寒颼淡蕩醒霜容露華洗出秋山面

洞仙歌

訪恒齋僧寓不值

訪君郭外攜手偕張緒片片閒雲在庭戶聽疎鐘隱



約透出林臯人不見門閉寒香一樹 倚欄看塔影  
且復徘徊時有春禽啄花語試問客何來滿案新詩  
儘細讀如同良晤欲小坐山頭待夕陽又恐被風光  
羈留還住

惜黃花

立冬後二日與諸同人集顧友星水亭卽事  
山寒雲膩柳昏煙繫愛平樓浸空明下臨無地窗隱  
綠天幽盆蓄黃花細聽度曲水晶簾底 或題蕉紙  
或凭竹几或狂呼弔桃根白蘋風起杯勺儘從容芋  
栗多風致敘舊別廿年還記 與友星別於邗  
上近二十年矣

臺城路

寒樹

霜彫落葉秋容盡憔悴暗陰多少一色寒煙半邊殘  
照收拾滿天歸鳥高低繚繞爭噪徧槎牙片時昏曉  
欹倚柴門蕭蕭搖曳酒帘小 繫馬荒原古道惹行  
人暫歇淒涼相弔冷撼嚴風聲呼凍雨響亂夜深如  
豹頰唐自老笑我則何堪近來懷抱彷彿雲林淡皴  
摹畫稿

綺羅香

賦得僧敲月下門



鳥擇高叢寺環野水旁晚人踪俱滅一領袈裟斜搭  
半肩明月隱隱近磬響疎煙寂寂是門關敗葉倚孤  
筇且自徘徊空傳剝啄聲還歇 隔牆踏碎松影惹  
臥苔黃耳吠穿籬穴谷應山鳴萬籟一時都發乍啓  
戶鐘韻將殘待入定爐香猶蕪爲蒲團乞食歸遲夜  
深纔洗鉢

望湘人

示一悟上人

自匆匆別了老樹江關算來夏又秋矣挑筍山籬聽  
鐘禪院今隔蒹葭煙水半榻爐薰一簾花影那時還

記喜心清愛惜幽芬寫贈幾枝蘭蕙 尚有舊家風  
味把袈裟斜挂竹中亭子好淨掃桐陰趺坐彈琴月  
底彈罷獨立碧雲秋霽應怨蒼波汀芷偏解送客子  
舟歸冷落香臺如此

雨中花

荒庭紅梅僅作數花風雨經旬殊堪憫惜

門閉橫斜一樹幾點淡紅淒楚落落疎疎天然清瘦  
冷蕊差堪數 纔向堦前舒媚嫵又被輕狂風雨且  
收拾寒香春情未了留作明年補

錦纏道



補梅

藤老牆陰舊有綠華嬌靚伴年年風清煙暝一朝香  
寂留孤影飄泊春魂逗起愁千頃 柰野草閒花貧  
家芳景覓倡條更重栽小徑賒來如蜜新醪換半規  
明月挂在疎櫺等

賀新郎

家汝梅以羊裘相贈垂五年矣今毛落衣敝  
追憶前情感而賦此

誰念垂鶉者感故人歲寒貽贈羔裘無價色澤蒙茸  
輕耐煖白練如銀光研儘不畏雪侵霜打倘遇灞橋

披氅客笑吟鞭呵凍忙無暇欲貰酒心難捨 連年  
衣被情深也柰襟裾星星彫敝楊花飛卸五月着來  
猶未免單復何論冬夏歎瘦骨支離盈把依舊北風  
欺敗絮讓五陵年少爭嗔罵推解事而今寡

水龍吟

周東會自黔中歸金沙以箒子書和孟浩然  
詩寄惠因和潘孟升韻用以代柬

白頭萬里歸來江東日暮懷人起只今還隔柳花春  
岸雨絲煙水竹下攜僧籬根喚酒昔年情思念閒門  
秋草落荒徑澀雲中雁書頻寄 怪我蕭條深巷似



蛩吟數聲牆底  
戢山書扇浩然  
詩句誰能忘此  
君獨憐余一竿  
波冷綸垂無餌  
拚今生側帽江  
潭有分啜糟醅  
醉

風入松

炙硯

家餘舊硯守長貧  
天暱歲寒人朝來  
欲賦梅花句春溪  
曲凝結冰紋呵處  
水窮雲起更添鑪  
火微燠移時墨蘸  
碧煙屯香散露珠  
勻隔簾吟弄橫斜  
影新詞就立寫湘  
裙生恐寒威還冽  
玉池凍合冰魂





